

PUANTAHTUTE TAN KAWL A ENG TAN TA

Lalhrilliana
Functional Manager,
Directorate of Commerce & Industries

Puantahtute tan kawla eng \an ta, han tih ngawt mai chu kan in sawi awk leh si ang tih a hlauhawm ang reng viau va. Amaherawhchu, sawrkar laipui kal phung leh a chet vel dan han thlir hian Puantahtute tan kawla eng \an ta tih loh rual a ni lo ang.

Puantah hi India ram pum ang pawhin mipui eizawna petu sector pawimawh tak a ni a. Agriculture tih lovah chuan eizawna a siam tam ber nghe nghe a. Chutiang a nih avang chuan sawrkar laipui chuan nasa taka chawikan tumin scheme hrang hrang puantahtute tan a buatsaih reng a.

Chung zingah chuan mipui tam zawkin kan chik lem loh GST awlna hi sawi hmasa ber ila. Sawrkar laipui chuan Goods and Service Tax dan hmangin chhiah chawi dan tur a han hmang \an ta a. Khawvel awm chung chu awm ve ngei tura kan ngaih tax toll gate India ram pumah tihbo a han ni ta a. Zoramah pawh Vairengte tax gate a awm ta lo. Hei vang hian bungraw phur truck rang tak takin an vei zung zung tawh a. Motor lianin Aizawl a\anga New Delhi thlen nana hun an hman \hin pawh ni hnih vel laiin a tlem phah ta hial a.

Chutiang taka tax system tih danglam a nih lai chuan puantah (handloom) tan tax chawi ngai lo turin GST hman a nih hnu hian sawrkar chuan a rawn ruahman ta a. He tax chawi loh hi a vannneihthlak tak meuh meuh a. Thilsiamtu dangten tax sang tak an chawi laia tax pek ve an ngai lo ta mai hi puantahtute tan kawla eng \an ta tih loh rual a ni lo.

Amaherawhchu, tax pek ngai lo nih vangin Taxation Department mamawh lo leh bikbo san ngawt tur a ni lo va. Pek ngai lo tih ti chiang tu No Due Certificate emaw Exemption Certificate lak ve tho tur a ni a. I puan tah chhuah i hralh hunah chu certificate chu i pek tel a ngai a. Chu chuan a leitu harsatna awm thei nasa takin a chhawk emaw a sutkian sak dawn a ni. Hetianga sum seng lova tax clearance la mai thei sector hi sector dang an tlem khawp mai. Chuvangin, puantahtute tan kawla eng \an chu a ni phawt mai.

Mizoram puantahtute hian harsatna hmachhawn tur lian tak an nei a. Anmahni puantahtute hian an hre mang hauh lo thung a. Enghelh pawh an enghelh tehchiam lo niin a lang. Tuna artificial trade – acrylic yarn Zoram puantahtute hman mek hi kan state chung leh kan \henawm hnai ho zingah sawisel kai lo mahse, hralhna zauh zel kawngah nasa takin harsatna min la thlen ngei dawn tih hi mithiam leh mi thil chik mite chuan an lo hmu lawk a.

Mizoram puantahtute hi an pung nasa em em a. Chuvangin, puan zawrh chhuah a tam a, man man tak emaw man to taka hralh a harsa ta khawp mai. Hei hian tun a\anga rei loteah ram pawn emaw hmarchhak pela puan kan hralh chhuah \ul hun a hring ngei dawn niin a lang a. Acrylic yarn hi petroleum a\anga siam (byproduct) a ni a. Hei hi hmarchhak state piah lam leh khawvel insumdawn tawnaah hi chuan hralh theih loh tluk a ni a. Natural fibre – cotton, silk, etc. hman a nih loh chuan khawvel market-ah a luh theih loh i ti mai teh ang.

Commerce & Industries Department-a kan hotute chuan he mi hre reng chung hian puantatute a theih ang chen chen zirtirna an pe reng a. NEDP hnuaiah pawh hian puantahtute

kawmna leh zirtirna neia acrylic yarn a\anga natural fibre hmang tura in zirtir turin ruahmanna siam a ni a. Sum pawh hmuh a ni tawh a. Hotute \hahnem ngaihna a zarah harsatna tak tak tawh hmain hma nasa taka lak a ni dawn hi puantahtute tan kawl a enna kawng khat chu a ni leh awm e.

Puantah hi hahtlak viauvin lang mahse, hna dang ngaihtuah chuan puantah hi a hahtlak a tih theih ang. Daih hlimah hna thawh a ni a, nipui khaw lum lai pawhin inkharkhip ngai lovin kawng hawng leh thlifim dawng chungin hna a thawh theih a. Hei ringawt pawh hi puantahtute tana kawl eng a tih theih bawng ang.

Sawrkar laipui chuan Act East Policy a hmaa Look East Policy tia sawi \hin kha chak leh zualin a kal pui mek a. Mizoram hi a chhawr tur tak state kan nih hmel a. Thil thawn chhuah leh lak luh a rem em em dawn a ni. Zoram a\anga thil thawn chhuah tur zingah chuan puantatute kutchhuak hi a langsar leh hmatheh zinga mi a ni ngei ang.

Khawchhak ram Act East Policy-in a focus ram South East Asian countries-a chengte khi a tam zawng chu mizo anga puan feng. A \hen pheih chu a hmei apaa puan feng dulh dulh mai an ni tih TV velah kan hmu thei reng a. Heng rama chengte kut chhuak leh mizo kut chhuak hi khaikhin rual lovin mizo puan hi a \ha chung chuang a. Kan rawng chi thlak leh chawhchawrawi hi hnamdang mit la leh chung chuang a ni a. Kan kut chhuak hrim hrim pawh hi a chung nung viau nia sawi a ni bawng a. Heng avang hian Act East Policy chhawr tur chu puantahtute kan ni a. Chuvangin, puantatute tan hian kawl a eng \an ta tak tak a ni.

India ram chhungah ngei pawh hian kan puantahtute kut chhuak hi a chhuanawm em em a. Mizo puan ang ngau ngau chuan hralh chhuah a har mai thei. Amaherawhchu, kan design nalh tak tak leh mawi tak tak hi sari cheina leh an kawr tawngchham lerh ru ang reng tak chei nan bakah an in chhung cheimawina atan kan hman tir thiam phawt chuan mizo nu zawng zawng hian puantah vek mahse kan chawm seng lo vang. Chutiang zawnga hma kan lak phawt chuan puantatute kawl hi a eng tak zet zet a ni.

Industry Meichher

Oct-Dec, 2018